



EYtel Fritz ex illustri familia comitū de Zollern natus, à teneris annis uirtutibus & studijs operam dedit, & in uirum prudentissimum euasit. erat enim foelicissimo ingenio, atq; multis corporis & animi uirtutibus præditus. Itaq; Maximilianus Cæsar eum plurimū dilexit, atq; res maximas expedire iussit. quas quidem ipse singulari dexteritate per fecit. Hactenus autem Imperiale iudiciū, quod Cameram uocant, Cæsaris aulā secutum erat. Id uerò cum partibus (ob Cæsaris uarias expeditiones) esset molestissimum, Maximilianus cōsilio cum principibus inito, illud in certo loco fixum esse uoluit, atq; certos assessores & Iudices ex omnibus Imperij ordinibus in id asciiuit. ipse etiā aliquoties præsedit, atq; supremi iudicis locum obtinuit. Postea autem hunc Eytelfritz suo loco præesse iussit, atq; eum primum Camere summum Iudicem constituit, id quod factum est anno 1495. Eam functionem cum is aliquandiu magna laude peregisset, atq; omnia ordine disposuisset, ad alia negotia expedienda à Cæsare uocatus fuit, atq; ei locus Marchio Badensis successit. Hac ratione factum, ut Eytelfritz ob multas animi & corporis uirtutes magnam sibi autoritatem apud Imperij principes conciliarit, atq; tandem multorum luctu mortuus præclarum nomen ad posteros transmiserit. Cam. Imperij.